

**«Қазақстан Республикасында дене шынықтыру мен спортты дамыту туралы» тақырыбында 2013 жылғы 21 қазанда өткен Үкімет сағатының нәтижелері бойынша**  
**ҰСЫНЫСТАР**

Қазақстан Республикасы Спорт және дене шынықтыру істері агенттігінің төрағасы Е.Т. Қожағапановтың «Қазақстан Республикасында дене шынықтыру мен спортты дамыту туралы» баяндамасын тыңдап және талқылап, Қазақстан Республикасы Парламентінің Мәжілісі мыналарды **ҰСЫНАДЫ:**

**Қазақстан Республикасының Үкіметі:**

- Мемлекет басшысының «Қазақстан-2050» стратегиясы – қалыптасқан мемлекеттің жаңа саяси бағыты» атты Қазақстан халқына Жолдауында айтылған дене шынықтыру және спорт саласындағы негізгі басымдықтарды кешенді түрде әрі тиімді іске асыруды қамтамасыз ететін болсын;

- Мемлекет басшысы қойған міндетті орындау жөнінде қажетті шаралар қабылдасын – дене шынықтырумен және спортпен жүйелі түрде шұғылданатын қазақстандықтардың санын 2020 жылға қарай 30 %-ға дейін ұлғайтсын;

- Қазақстан Республикасында дене шынықтыру мен спортты дамытудың 2014-2018 жылдарға арналған мемлекеттік бағдарламасын әзірлеп, оны іске асыру жөніндегі іс-шаралар жоспарын Республикалық бюджет комиссиясының қарауына ұсынсын;

- Үкіметтің жанынан Дене шынықтыру мен бұқаралық спортты дамыту мәселелері бойынша ведомствоаралық іс-қимыл жөніндегі үйлестіру кеңесін құрсын;

- Дене шынықтыру мен спортты дамыту жөніндегі ғылыми-зерттеу институтын құрсын;

- қалалар мен аудандар әкімдіктерінің жанынан спорт және дене шынықтыру бөлімдерін құру туралы мәселені қарастырсын;

- өңірлерде бөлінген бюджет қаражаты шеңберінде жаңадан салынатын ДСК санын үштен бірге арттыруға мүмкіндік беретін, оңай құрастырылатын, ресурс үнемдейтін жаңа технологияларды пайдалана отырып, ДСК салуды қамтамасыз етсін;

- халықтың барлық санатын дене шынықтырумен және спортпен күнделікті шұғылдануға қамту, халық үшін қолжетімді спорттық-сауықтыру мақсатындағы құрылыстардың болу көрсеткіштерін, сондай-ақ оқу орындарының спортзалдарын спорт жабдықтарымен жарақтандыру көрсеткіштерін барлық деңгейдегі әкімдердің рейтингіне енгізісін;

- спорттық объектілерді салу мен реконструкциялау кезінде, әсіресе, ауылдық жерлерде мектептерді спортзалдармен және жабдықтармен қамтамасыз ету кезінде мемлекеттік-жекешелік әріптестік құралдарын қолдану тетігін енгізісін;

- балалар-жасөспірімдер спорт мектептерінің (БЖСМ) желілерін, оның ішінде қысқы спорт түрлері бойынша желілерін кеңейту, жұмыс істеп тұрған БЖСМ-де қысқы спорт түрлері бойынша бөлімшелер ашу мәселесін қарастырсын;

- саябақтар мен квартал ішіндегі аумақтарды балалар мен жасөспірімдерге арналған, арзан әрі сапалы спорт жабдықтарымен жарақтандыру мақсатында құрылыс нормалары мен қағидаларын (ҚНҚ) өзгерту жөнінде ұсыныстар енгізісін;

- кәсіпорындар мен ұйымдар басшыларының қызметкерлерді спортпен шұғылдануға тарту үшін жағдай жасау, олар үшін жұмыс уақытындағы үзіліс кезінде, сондай-ақ кешкі уақытта арнайы емдік дене шынықтыру залдарын ұйымдастыру жөніндегі қызметін ынталандыру тетігін әзірлесін;

- өңірлерде спорттық объектілерді күтіп-ұстауды тікелей қаржыландыру нормаларын Бюджет кодексіне енгізу, спорттық құрылыстарды қолдау бойынша шығыстарды көрсете отырып, Бірыңғай бюджет сыныптамасына қосымша код енгізу жөніндегі мәселені қарастырсын;

- Астана қаласының жаңа «Индустриялық саябақ» өнеркәсіптік аймағында спорт тауарлары мен өнімдерін шығару бойынша өндіріс құру мәселесін пысықтасын;

- спорттық құрылыстардың үлгі штат кестелерінің вариативтілігін қамтамасыз ету, спорттық-сауықтыру мақсатындағы объектілердің, оның ішінде мектеп спорт залдарының қызметін стандарттау, оларды тиісті спорттық жабдықтармен және мүкәммалмен жарақтандыру бөлігінде өзгерістер мен толықтырулар енгізе отырып, дене шынықтыру және спорт саласындағы заңға тәуелді барлық нормативтік құқықтық актілерге тексеріс жүргізісін;

- Қазақстан Республикасы Үкіметінің «Азаматтық қызметшілерге, мемлекеттік бюджет қаражаты есебінен ұсталатын ұйымдардың қызметкерлеріне, қазыналық кәсіпорындардың қызметкерлеріне еңбекақы төлеу жүйесі туралы» 2007 жылғы 29 желтоқсандағы № 1400 және «Мемлекеттік білім беру ұйымдары қызметкерлерінің үлгі штаттарын және педагог қызметкерлер мен оларға теңестірілген адамдар лауазымдарының тізбесін бекіту туралы» 2008 жылғы 30 қаңтардағы № 77 қаулыларын іске асыруды қамтамасыз ететін болсын;

- білікті спорттық дәрігерлерді, емдік дене шынықтыру (ЕДК) мамандарын даярлау мақсатында медициналық оқу орындарының жанынан спорттық медицина факультеттерін ашсын;

- мүгедек балалардың дене бітімін оңалту үшін ЕДК-нің үлгі ережелері мен бағдарламаларын әзірлесін;

- халық арасында Президенттік тестілерді кең ауқымда іске асыру мақсатында тестілердің құрылымына, нормативтеріне, оларды тапсыру тәртібіне өзгерістер енгізісін;

- жұртшылықты, педагогтарды, ата-аналарды, БАҚ-ты тарта отырып, халықтың саламатты, белсенді өмір салтына, дене шынықтырумен және

спортпен жүйелі түрде шұғылдануға деген қажеттілігін қалыптастыру бойынша нақты шаралар қабылдасын;

- «Саламатты Қазақстан» мемлекеттік бағдарламасы шеңберінде бөлінген қаражаттың дене шынықтыру мен спорт жөніндегі ақпараттық-насихат жұмысына, дұрыс тамақтануды ұйымдастыру бойынша халықты ақпараттандыруға ұтымды әрі тиімді пайдаланылуын қамтамасыз етсін;

- халық денсаулығының, балалардың, жасөспірімдердің, әскерге шақырылушы, жұмысшы және студент жастардың дене шынықтыру дайындығының жай-күйі мониторингінің жүйелі түрде жүргізілуін қамтамасыз етсін;

- халықтың түрлі әлеуметтік топтары арасында ұлттық спорт түрлері бойынша ауылдық, қалалық, облыстық, республикалық жарыстар өткізсін;

- спорттық объектілердің қолжетімділігі проблемасын шешу мақсатында оларға азаматтардың аз қамтылған санаттарының, мүгедек адамдардың белгілі бір күндер мен сағаттарда тегін, жеңілдікпен кіру мәселесін зерделесін;

- министрліктер мен ведомстволардың медициналық пункттер, оқу орындары, әскери комиссариаттардағы әскерге шақыру комиссиялары қызметін ұйымдастыру мәселесі бойынша функциялары мен өкілеттіктерінің ара-жігін ажырататын болсын.